



Inyuma y'imyaka ibiri, nta butungane ku bwicanyi ku mvo za politike

Ikete ryuguruye ku mukuru w'igihugu Varisito Ndayishimiye

Ku wa 30 Ruheshi 2022

Nyenicubahiro,

Tubandikiye mu gihe c'isabukuru y'imyaka ibiri iheze mwimitswe nk'umukuru w'igihugu c'Uburundi.

Haraheze imyaka ibiri, inyuma gato murahiriye kuyobora igihugu, *Initiative pour les droits humains au Burundi* yarabandikiye ikete ryuguruye, ryavugaga ido n'ido ingene abantu batandatu bishwe hagati y'ukwezi kwa Gitugutu 2019 na Rusama 2020 kubera imigambwe barimwo. Ivyo biradondaguye aha musu.

Abenshi mubishwe bari abanywanyi b'umugambwe utavugaga rumwe n'ubutegetsi, Inama y'igihugu iharanira umwiteganyeho (CNL). Imbonerakure, abanywanyi b'umuhari w'urwaruka rw'umugambwe uri kubutegetsi – Inama y'igihugu iharanira intwari rusangi-umuhari urwanira intwari rusangi (CNDD-FDD) – niba bagirizwa vyinshi muri ivyo vyaha. Muri bimwe, imbonerakure zakoranye n'abategetsi bo kuzunguza zo hasi canke abasurukira umugambwe CNDD-FDD ku rwego rwo hasi canke bakabashigikira biboneka ; bamwe muri abo bategetsi baramaze kuzunguza mu mabanga.

- Ku wa 7 Munyonyo 2019, mu ntara ya Ngozi, Varisito Nyabenda, umunywanyi wa CNL, yarasandavye kubera ibikomere. Imbonerakure zari zamukubise mu gihe yariko aragerageza kuzibuzira gukubita abandi banywanyi ba CNL.
- Ku wa 12 Kigarama 2019, mu ntara ya Bujumbura, Désiré Ntahondabasigiye, yaserukira CNL ku mutumba, yarasiye mw'idirisha ry'inzu yiwe. Imbonerakure zibiri zitwaje ibigwanisho zarabonetse mu micungararo y'inzu yiwe imbere y'uko yicwa.
- Ku wa 4 Ntwarante 2020, mu ntara ya Musinga, Fauzia Basesuwabo, umunywanyi wa CNL, yarasandavye kubera ibikomere, inyuma y'imisi mike akubiswe n'imbonerakure co kimwe n'uwo bari bubakanye n'abahungu babo batatu.
- Ku wa 9 Ntwarante 2020, mu ntara ya Bururi, Albert Niyondiko, yikekwa kuba ashigikiye abatavugaga rumwe na Leta bitwaje ibirwanisho, yarashwe mu gikorwa cakoze n'igipolisi n'iperereza.

- Ku wa 29 Ntwarante 2020, musitanteri wa komine Ryansoro, mu ntara ya Gitega, Seconde Ndayisenga, yarahaye imbonerakure itegeko ryo kwica Jean Bosco Ngabirano, umunywanyani wa CNL. Ikiziga ciwe catowe bukeye ; vyaraboneka ko yakubiswe bikomeye.
- Ku wa 4 Rusama 2020, indwi zibiri imbere y'amatora, Richard Havyarimana, umunywanyani wa CNL, yaranyurujwe mu ntara ya Mwaro, yahavuye atorwa mu ruzi ari ikiziga inyuma y'imisi itatu, afise ibiguma binini mu mutwe.

Nta butungane bwigeze bubaho ku bwicanyi haba kuri Varisito, kuri Désiré, kuri Fauzia, kuri Albert canke Jean Bosco. Nta numwe yigeze akurikiranwa kuri ubwo bwicanyi bwabo, amatohoza yarahagaritswe, kandi imwe mu miryango y'abo bishwe yaratowe ubwoba kugira ukuri kunigirwe mu menshi.

Igisa n'ubutungane carabaye gusa kuri Richard Havyarimana. Muri Myandagaro 2020, sentare y'intara ya Mwaro yarahanishije imbonerakure zibiri igihano c'umunyoro w'imyaka 15 kubera ubwicanyi. Abandi bakekwa kuba baragize uruhara mw'inyuruzwa ryiwe ntibigeze bahagarikwa, kandi umwe mu mbonerakure yaciriwe igihano yarabonetse inyuma y'ibohero, ku mutumba hafi y'aho asanzwe avuka.

Ivyo vyabaye sivyo vyonyene kandi si ivyakera. Kuva mutorewe kuba umukuru w'igihugu, twaratohoje no ku bundi bwicanyi bufatiye kuri politike, ku babuzwe irengero, no kuborezwa igufa ku batavuga rumwe na Leta bakurikira :

- Ku wa 25 Nzero 2021, Egide Sindyigaya, afise imyaka 64, yarapfiriye mu gasho k'igipolisi c'intara ya Rumonge, inyuma yaho iperereza rimuboreje igufa n'aho igipolisi ciciye mwenewabo.
- Ku wa 15 Rusama 2021, umunywanyani wa CNL, batazira Rasta, yaratowe ari ikiziga mu ntara ya Bubanza inyuma y'aho imbonerakure zari zaraye zimukubise bikomeye.
- Ku wa 30 Ruheshi 2021, mu ntara ya Bururi, igipolisi cararashe Bernardino Baserukiye, yarahejeje kurekurwa ava mw'ibohero ; umukuru w'igipolisi ca komine Moïse Arakaza yamwagiriza ko ari umurwanyani.
- Ku wa 9 Mukakaro 2021, abagabo bambaye umwambaro wa gisirikare baranyurujwe umunywanyani wa CNL, Eliya Ngomirakiza i Bujumbura. Ntawurongera kumukubita ijisho kandi hiyumvirwa ko yoba yarishwe.
- Hagati ya 29 Munyonyo na 3 Kigarama 2021, Innocent Barutwanayo, umunywanyani wa CNL, yarapfuye mu gihe yari apfungiwe ku cicaro gikuru c'iperereza i Bujumbura, inyuma yo kuborezwa igufa n'iperereza mu Kayanza.
- Ku wa 15 Kigarama 2021, Augustin Matata, umunywanyani wa CNL, yarapfuye inyuma yo kuborezwa igufa ku cicaro gikuru c'iperereza i Bujumbura.

Kamwe gusa muri utwo turorero tw'ivyabaye muri 2021 niko gatanga umwizero ko ubutungane bushobora gukora. Muri Kigarama 2021, umukozi w'iperereza Gérard Ndayisenga yarahagaritswe kubera uruhara rwiwe mu rupfu rwa Augustin Matata, icaha kimwe gusa muri vyinshi yakoze mu myaka yamaze mu gisata c'iperereza. Ihagarikwa rya Ndayisenga ryabaye ikintu gihambaye. Mwaremeye ko ategerezwa « guhanwa bimwe vy'akarorero ». Mwoba muzokwitwararika ku buryo ubutungane bumubaza ku vyaha vyo kuboreza igufa, ubwicanyi n'ibindi vyaha bikomeye yakoze nk'umukozi w'iperereza, agacirwa urubanza vuba, hakurikijwe ingene imanza zikurikiranwa zikongera zikaburanishwa mu buryo bwizewe ?

Mu majambo menshi mwashikirije ku mugaragaru muri iyi myaka ibiri irangiye, mwaravuze mushimitse ko Uburundi bukeneye ubutungane, mwaremeje ko « nta muntu n'umwe ari hejuru y'amategeko » kandi ko « ivyari bizingamitse ubutungane biriko birakosorwa ». Ariko rero, hariho ubudasa bunini hagati y'ivyo mwemereye abanyagihugu n'ukuri kwibonekeza. Ingene ubucamanza bukora ntacahindutse kinini, ntiburashobora kurengera gukoreshwa n'abanyapolitike. Ukwo kudatera intambwe kwateye agahinda gakomeye abakorewe ivyaha n'imiryango yabo ; barafise uburenganzira bwo kumenya ukuri no kubona abakoze ivyaha barengutswa imbere y'ubutungane.

Muri ubwo burorero 12 twavuze aho hejuru, hari intambwe zashoboye guterwa ku vyaha bibiri gusa muri ivyo vy'ubwicanyi, kuvyerekeye gukurikirana mu butungane bamwe mubavyagirizwa. Ukudahana gukingira ikibaba abagirizwa ubundi bwicanyi ni kwo kwibonekeza mw'ihohoterwa rikabije ry'uburenganzira bwa kiremwa muntu rikorerwa abatavuga rumwe na Leta vyukuri canke biketswe muri iyi myaka ibiri irangiye.

Nyenicubahiro, igihe mwinjira mu mabanga yanyu, abarundi benshi, hamwe n'abandi bo mu makungu mukorana bari biyumvira ko mufise imigambi ikomeye yo kunagura ubutungane. Bari bifuje kubaha icizere. Inyuma y'imyaka ibiri, ico cizere kiratanguye guhera.

Mwarijeje incuro nyishi ko mugiyeye kurandurana n'imizi igiturire mu rwego rw'ubucamanza, ariko ntimwashoboye kurangiza ukwivanga kw'abanywanyi b'umugambwe uri kubutegetsu, abakozi b'iperereza n'abandi bategetsu babangamiye ubwigenge bw'ubutungane.

Nk'uwujewe amabanga y'umukuru w'igihugu, ajejwe kwubahiriza ubwigenge bw'ubutungane, akaba ariwe agenzura urwego rw'iperereza, murafise ubushobozi bwotuma abategetsu bakomakomeye babakikije – hamwe n'ababegereye bakorana – bashengezwa mu butungane. Murashobora kurandurana n'imizi ukudahana kugahera burundu. Muherutse kuvuga muti « ukudahana kuvyara akajagari ». Ivyo mwavuze ni ukuri. Mu gihe ubutungane buzoboneka ku vyaha bikomakomeye, nko kuri ibi vyaha twadondaguye muri iri kete, niho honyene Uburundi buzoshobora kurengera ivyabaye muri kahise bugashimikira ku ntambanyi z'imibano n'ubutunzi muri kazoza.

Ni mwakire, Nyenicubahiro Umukuru w'igihugu, icifuzo cacu kivuye ku muzirikanyi.

L'Initiative pour les droits humains au Burundi

Mwipfuzwa kumenya vyinshi ku burorero bwatanzwe mw'ikete ryuguruye, some « [Ikiguzi c'urupfu ku batavuga rumwe na Leta](#) » na « [Urugendo rusigaye : Uburundi buzorengutsa mu butungane ababwo bagirizwa guhohotera ?](#) »